

Morning Dogri (NSD) National News Bulletin 29-07-2024

आकाशवाणी

- प्रधानमंत्री नरेन्द्र मोदी होर केन्द्री सरकार दिएं स्कीमें दी पहुँच बधाने लेई पुट्टे जाने आलिएं गैई बारे चर्चा करने लेई बीजेपी दे मुख्मंत्रिं ते उपमुख्मंत्रिं कन्नै बैठक लाई।
- विदेश मंत्री डॉ. एस.जयशंकर जापान, अमरीका, आस्ट्रेलिया दे अपने समकक्षें कन्नै अज्ज टोक्यो च क्वाड विदेश मंत्रिं दी बैठक च हिस्सा लैंगन।
- दिल्ली नगर निगम नै ओल्ड राजेन्द्र नगर च सिविल सर्विसिस दी कोचिंग दे आले 13एं कोचिंग सेंटरें दे बेसमेंट सील करी ओड़न। इआं बेसमेंट च पानी भरने करी त्रऊं छात्रें दी मौत होने मगरा कीता गेआ ऐ।
- शिक्षा मंत्रालय अज्ज राष्ट्रीय शिक्षा नीति 2020 दे लागू होने दी चौथी ब'रेगंड मनाग।
- मनु भाकर नै कैह दा तगमा जित्तिथै पैरिस ओलंपिक्स च भारत लेई तगमे दा शुभरंभ कीता ऐ।
- श्रीलंका कन्नै त्रऊं मैचें दी श्रृंखला च दो मैच जित्तिथै भारत नै श्रृंखला दी जित्त पर मोहर पक्की करी लेई ऐ।



PM-CMs

प्रधानमंत्री नरेन्द्र मोदी होरें केन्द्र सरकार दिएं योजनाएं दी पुज्ज हर कुसै तोड़ी पजाने लेई बीजेपी शासत राज्यें दे मुख्मंत्रिं ते उपमुख्मंत्रिं कन्नै चर्चा कीती। मोदी होरें सब्बनं गी अपने अपने राज्यें च शासन बवस्था गी होर बेहतर बनाने लेई केई सुझाह दित्ते ते कल्याणकारी योजनाएं दा लाह बेहतर ढंगा सिर लोकें तगर पजाने पर जोर दित्ता। कल नमीं दिल्ली च आयोजत बीजेपी मुख्मंत्री परिषद दी दऊं रोजा बैठक गी संबोधत करदे होई आक्खी। बैठक दा मकसद बीजेपी शासत राज्यें दी कारकरदगी ते केन्द्र प्रायोजत स्कीमें दी समीक्षा करना हा।

बैठका च बीजेपी प्रमुख जे.पी.नड्डा ते पार्टी दे वरिष्ठ नेता राजनाथ सिंह ते अमित शाह होर बी मजूद हे, मोदी होरें आखेआ जे केन्द्र प्रायोजित स्कीमां बड़ी एहतियात कन्नै तैआर कीतियां जंदियां न ते राज्य च इंदी अमलावरी दे तौर तरीके कन्नै छेड़छाड़ कोला बचेआ जाना लोड़चदा। बैठक दे बाद पार्टी नेता विनय सहस्रबुद्धे होरें आखेआ जे मोदी होरें इनें योजनाएं दी असरदार अमलावरी ते सब्बने तोड़ी इंदा लाह जकीनी तौरा पर पजाने पर जोर दित्ता।

<><><><><><>

QUAD Meeting

विदेश मंत्री डॉ. एस.जयशंकर होरें अज्ज जापान दे टोक्यो शैहरा च लग्गा'रदी "क्वाड" मुख्यें दे विदेश मंत्रिणं दी बैठक च शामिल होंगन। ओह जापान दी दऊं दिने दी यात्रा पर कल उत्थें पुज्जे हे। इस बैठका च आस्ट्रेलिया, भारत, जापान ते अमरीका दे बउड़े राजनयिक इक्कै मंच पर किट्ठे होआ करदे न। कल इक संवाददाता सम्मेलन च विदेश मंत्रालय दे प्रवक्ता रंणधीर जैसवाल होरें आखेआ जे एह बैठक उंदे लेई क्वाड दे एजंडे गी अगड़ा बधाने ते हुनै तगर दिणं उपलब्धिणं दी समीक्षा करने दा मौका ऐ। क्वाड इनें चऊं मुख्यें बश्कार राजनयिक सांझ-भ्याली, इक खुल्ले, स्थिर ते समृद्ध भारत प्रशांत क्षेत्र दा समर्थन करने लेई वचने बज्जे दा ऐ।

<><><><><><>

MCD

दिल्ली नगर निगम नै राष्ट्रीय राजधानी च राजेन्द्र नगर थाहर लोक सेवाएं दी कोचिंग देने आले 13एं कोचिंग सेंटरें दे बेसमेंट सील करी ओड़े न। दिल्ली नगर निगम दे अफसरें दस्सेआ जे बेसमेंट च चला'रदे त्रऊं कोचिंग सेंटरें गी बंद करी दित्ता गेआ ऐ ते सरकार नै जांच दे हुक्म देई दित्ते न। जंदे शनिवारें इक कोचिंग सेंटर दे बेसमेंट च पानी भरने करी त्रऊं विद्यार्थिणं दी मौत होई गई ही। एह्दे मगरा केइणं छात्र-संगठनें राजेन्द्र नगर इलाके च आम आदमी पार्टी दे प्रशासन खलाफ विरोध प्रदर्शन कीता हा। अखिल भारतीय विद्यार्थी परिषद दे छात्र लीडर बड़ी मती गिनतरी च दिल्ली दिणं मेयर शैली ओबरॉय दी कोठी सामने किट्ठे होए ते विरोध प्रदर्शन कीता।

<><><><><><>

NCW-Delhi

राष्ट्रीय महिला आयोग नै नमीं दिल्ली दे इक कोचिंग सेंटर च बरखा दा पानी भरोची जाने करी त्रऊं विद्यार्थिं दी मौत दा संज्ञान लैंदे होई आखेआ ऐ जे नाले दी सफाई कराने दी अपील गी अनदिक्खा कीते जाने दे आरोप चिंताजनक न। आयोग नै इस मामले दी सुनवाई 2 अगस्त गी करने दा फैसला कीता ऐ। नमीं दिल्ली दे राजेन्द्र नगर विधानसभा क्षेत्र दे विधायक दुर्गेश पाठक होरें गी नोटस जारी करियै सुनाई दे दरान हाजर रौहने दा निर्देश दित्ता गेआ ऐ। राष्ट्रीय महिला आयोग नै आखेआ ऐ जे नोटिस पर कारवाई नेई होने पर पूरी कारवाई कीती जाग।



Education NEP

शिक्षा मंत्रालय अज्ज नमीं दिल्ली दे मानेक शॉ सेंटर च अखिल भारतीय शिक्षा समागम एबीबीएस-2024 दे कन्नै राष्ट्रीय शिक्षा नीति 2020 दी लागू कीते जाने दी चौथी ब'रेगंड बनाग। अखिल भारतीय शिक्षा समागम दी पकरकल्पना राष्ट्रीय शिक्षा नीति 2020 दी असरदार अमलावरी लेइ सरबंधत सब्बने हितधारकें दी प्रतिबद्धता गी निगगर बनाने लेई कीती गेदी ऐं इस मौके पर शिक्षा मंत्री नीति 2020 दी अमलावरी कन्नै जुड़े दे अपने तर्जुबे सांझा करगन। मंत्री होर बक्ख-बक्ख भारतीय भाषाएं गी सिक्खने दी सुविधा आले टीवी चैनलें समेत शिक्षा विभाग दिऐं केइं महत्वपूर्ण पैहलें दा बी उदघाटन करगन।



Olympics

पैरिस ओलंपिक्स च भारत गी पैहला तगमा मनु भाकर नै दोआया ऐ। कल खेड्डें दे दुए दिन 10 मीटर एयर पिस्टल इवेंट च उनें 221.7 अंक लेइयै कैह् दा तगमा अपने नां कीता। मनु भाकर नशानेबाजी च तगमा जित्तने आली पैहली महिला खडारी ऐ। नशानेबाजी च भारत नै 12एं ब'रें मगरा तगमा हासल कीता ऐ। मनु होरें आखेआ जे खीरी नशाने तगर उनें पूरी कोशश कीती। अज्ज पैरिस ओलंपिक्स दे त्रिए दिन सब्बने दियां मेदां भारती नशानेबाजें पर होंगन जिसलै रमिला जिंदल 10 मीटर एयर रफल महिला दे फाइनल तैहत दपैहरी मगरा 1 बजे तगमे लेई मकाबला करगन। इस्सै चाल्ली मर्दे दे वर्ग च अर्जुन बबूरा दपैहरी मगरा साढ़े 3 बजे इस्सै इवेंट दे फाइनल लेइ प्रदर्शन करगन।

ओलंपिक्स तगमे जेतु मनु प्रभाकर ते सरबजोत सिंह ते अर्जुन सिंह चीमा ते रिदम सांगवान दी दूर्ई तोड़ी 10 मीटर एयर पिस्टल मिक्सडटीम दे क्वालीफिकेशन राउंड च दपैहरी मगरा पौने 1 बजे मैदान च उतरगंन। इसै चाल्ली पृथ्वी राज टोंडायमन मर्दे दे वर्ग च दपैहरी मगरा 1 बजे अपनी योग्यता दा लोहा मनवांगन। मर्दे दी हॉकी प्रतियोगिता च अज्ज भारत पूल-बी दे मैच च संजा सवा 4 बजे अर्जेटीना कन्नै मैच खेडोग। ओलंपिक्स दे पैहले दिन गै न्यूजीलैंड गी हराने मगरा भारती टीम दे हौसले बुलंद न ते मेद ऐ जे ओह जित्त दे इस जज्बे गी कायम रकखोग। चिड़ी-शिकके दे मैचें च मर्दे दे इक्कले-इक्कले आले गुप-एल मैच तैहत् भारत स्टार शटलर लक्ष्य सेन बैल्जियम दे जुटिन कररागी कन्नै संजा साढ़े 5 बजे मैच लाग। तीरंदाजी च मर्दे दी टीम दे क्वार्टर फाइनल मैच च धीरज बोम्मदेवरा, तरुणदीप राय ते प्रवीण रमेश जाधव दी तिगड़ी अज्ज संजा साढ़े 6 बजे मैच लांगन।

<><><><><><>

Cricket

श्रीलंका खलाफ टी-20 श्रृंखला दे त्रऊं मैचें च भारत नै दूए टी-20 मैच श्रीलंका गी 7एं विकेटें कन्ने अजय 2-0 दी बढ़त बनाई लैती ऐ। एह मैच कल रातीं पॉलीकेले अंतर्राष्ट्रीय क्रिकेट खेड्ड मैदान च खेड्डेआ गेआ हा।

<><><><><><>

IMD

मौसम विभाग नै औंदे 5एं दिनें दरान हिमाचल प्रदेश, उत्तराखंड ते पूर्वी राजस्थान च हल्के कोला दरमयाने दर्जे दी बरखा बरने दी पेशगोई कीती ऐ। मैह्कमे मूजब इस दरान लद्दाख, जम्मू कश्मीर, गिलगित, बल्तिस्तान, मुजफ्फराबाद, पंजाब, हरियाणा, चंडीगढ़, दिल्ली, उत्तर प्रदेश ते पच्छमी राजस्थान च भारी बरखा दे असार दस्से न।

<><><><><><>

Amarnath Yatra

श्री अमरनाथे दी यात्रा पूरी चाल्ती रमानदारी ते बवस्था आले ढंगै सिर जारी ऐ। तोआई जम्मू थमां अज्ज बडलै 1 ज्हार 832 श्रद्धालुएं गी लेइयै इक होर जत्था अज्ज बडलै सख्त सुरक्षा बंदोबस्ते हेठ कश्मीर घाटी लेई रवाना होआ। कुल 62 गडिडएं दे काफले च रवाना इस जत्थे च 1 ज्हार 358 मर्द, 363 महिला, 2 न्याणे, 97 साधु ते 12 साध्वियां शामिल हियां, जेह्ड़े बडलै कोई साढे क त्रै बजे बम बम भोले दे जयकारे लांदे जम्मू दे भगवती नगर आले आधार शिविर “यात्री निवास” थमां रवाना होए। इंदे च 1 ज्हार 26 श्रद्धालु पहलगाम लेई ते 569 बालटाल लेई रवाना होए, जित्थुआं अगगे ओह पवित्र गुफा लेई अपनी यात्रा शुरू करगंन।

<><><><><><>

Asaam Police

असम पुलिस नै राज्य दे कछार जिले च 9 करोड़ रपे दियां नशीली दोआइयां जब्त कीतियां न ते नशीले पदार्थे दी तस्करी दे कारोबार च मल्लवज इक आदमी गी गिरफ्तार कीता ऐ। इस बारे इक टकोह्दी सूह् थोने पर शनिवारें कटखल इलाके च इक विशेष अभियान चलाया हा जिस दरान अब्दुल अलीम नां दे इक आदमी कोला नशीली दोआई मैथामफैल्टामाईन दियां 70 ज्हार टिकियां जब्त कीतियां।

<><><><><><>